

榕

陰

新

檢

榕陰新檢卷十五

閩徐 勗興公輯

歙吳洵美充符校

幽期

金鳳外傳

陳后金鳳者閩主王延鈞之后福清萬安鄉人也父  
侯倫少年美丰姿唐景福初事閩觀察使陳巖以色  
見巖居起輒與共因得出入臥內其妾陸氏與之私  
有娠未幾巖卒壻范暉自稱留後陸託于范生一女  
其夕夢飛鳳入懷因名金鳳冒姓陳及王審知兵入

閩攻殺范氏金鳳流落民間嚴族人陳匡勝收養之  
梁開平三年審知封閩王選良家女充後宮時金鳳  
年十八性度窈窕善歌舞通音律審知聞之召爲才  
人特蒙寵倖宮室服御之奉與魯國夫人黃氏比嘗  
築水晶宮于西湖傍列臺榭周廻十餘里金鳳時扈  
駕從于城複道中出游然不及蕩後唐同光三年審  
知卒子延翰繼之延翰妻崔氏陋而淫性復妬搜諸  
宮人之美者輒幽之別室繫以大械刻木爲人手擊  
其頰又以鍊錐刺其臂一歲中死者八十四人時金  
鳳已乞身爲尼深自匿故得免次年延翰爲周彥琛

所弑而延鈞立延鈞審知次子初娶漢清遠公主有  
美色早世繼選金氏劉氏皆賢而無寵後宮數百無  
可意者內侍李倣極譽金鳳姿色超絕延鈞御紫宸  
門宣見大悅封之爲淑妃長興三年延鈞稱帝國號  
閩改元龍啓進封金鳳爲皇后追封其假父陳巖爲  
威武軍節度使母陸氏爲長樂郡夫人族人陳匡勝  
爲殿使始築長春宮居之延鈞數于其中爲長夜之  
宴每宴輒燃金龍燭數百枝環左右光明如晝勅宮  
女數十人擎一杯盤皆金玉瑪瑙琥珀玻璃之屬以  
次遞進不設几筵酒酣張長枕大床擁金鳳與諸宮

女裸臥隨意幸之又遣使于日南造水晶屏風周圍  
四丈二尺延鈞與金鳳淫狎于內令宮女隔屏覘之  
嬉笑爲樂三月上巳延鈞脩褉桑溪金鳳偕後宮雜  
衣文錦列坐水次流觴娛暢沉麝之氣環珮之響燎  
炬之光達于遠近途中絲竹管絃更番迭奏清音入  
雲觀者塞道不能前端陽日造綵舫數十于西湖每  
舫載宮女二十餘人衣短衣鼓楫爭先延鈞御大龍  
舟以觀金鳳作樂遊曲使宮女同聲歌之曲曰龍舟  
搖曳東復東采蓮湖上紅更紅波澹澹水溶溶奴隔  
荷花路不通又曰西湖南湖闢綠舟青蒲紫蓼滿中

洲波渺渺水悠悠長奉君王萬歲遊遊人士女綺繡  
夾岸雜沓如市夜收宮女入宮多不知所之者延鈞  
亦不問有小吏歸守明弱冠美皙如玉延鈞嬖之常  
呼爲歸郎延鈞有風疾歸郎日侍禁中夤緣與金鳳  
通又有百工院使李可殷少與歸郎狎因歸郎以通  
于金鳳可殷聰敏有智巧歸郎令造縷金五綵九龍  
帳于長春宮織八龍帳外以延鈞爲一龍旣成進之  
極其華靡延鈞歡甚益昵歸郎日留宿于內不出國  
人歌曰誰謂九龍帳惟貯一歸郎初金鳳因李倣得  
進及爲后倣自矜其功且微聞九龍帳中事頗橫恣

不爲忌金鳳不能堪令可殷譖之延鈞倣聞之怨金鳳負已謀所以奪之寵廼盛飾其妹春燕以進春燕婉媚絕代初入宮年方十五顧盼舉止動移上意遂大見幸冊爲賢妃封倣爲皇城使擅愛專席延鈞從此不復御九龍帳矣有言真封宅龍見者延鈞就其地造躍龍宮又爲春燕造東華宮皆以珊瑚爲枕櫺琉璃爲櫺瓦檀楠爲梁棟真珠爲簾幙範金爲柱礎窮工極麗宮中供匠作者萬人用匱不給倣舉薛文傑充國計使文傑巧佞善聚歛多察民間陰事致富人以罪而籍沒其資被榜捶者胷背分受仍銅斗慰

之建州土豪吳光入朝文傑利其財物將求其罪治  
之光怒帥衆叛奔吳引吳人攻建州延鈞遣將救之  
兵行在道不肯進曰得文傑乃進延鈞不得已送文  
傑于軍中磔殺之金鳳諷右省常侍李洵等上言文  
傑導九重淫靡竭萬戶膏脂天怒人怨禍亂旦夕皆  
由李妃與倣爲戎首今文傑就誅妃倣不宜在上左  
右延鈞意猶豫明年元夕御大酺殿召前翰林學士  
承旨韓偓弘文館學士王偁右補闕崔道融吏部郎  
中夏侯淑等觀燈賜宴命各賦大酺樂偓感長春宮  
失寵賦詩曰淚滴珠難盡容殘玉易消倘隨明月去



莫道夢魂遙延鈞爲之動因返駕長春宮李淑知人心罪已不自安私與春燕畫全身之策以去繼鵬與匡勝有隙乃言春燕之美于繼鵬繼鵬入宮問疾遇春燕于前廡悅之就所居丞丞焉匡勝聞而白其事延鈞大怒與次子繼韜議殺繼鵬繼鵬懼與李倣圖之適醫工陳究從宮中出言延鈞病不起倣遽冷壯士先殺李可殷于家質明金鳳訴之延鈞強起視朝詰可殷死狀倣聞驚惶逼繼鵬率皇城衛士入延鈞聞鼓噪聲走匿九龍帳中衛士刺之不死宮人不忍其苦爲絕之繼韜及金鳳歸郎皆遇害於是繼鵬卽

帝位改永和二年爲通文元年立春燕爲皇后以李  
倣判六軍諸衛事繼鵬元妃梁國夫人李氏同平章  
事敏之女繼鵬嬖春燕欲廢夫人內宣徽使叅政事  
葉翹諫曰夫人先帝之甥聘之以禮柰何以新愛棄  
之繼鵬不聽翹復上書極爭繼鵬批其紙尾曰春色  
曾看紫陌頭亂紅飛盡不禁秋人情自厭芳華歇一  
葉隨風落御溝放翹歸老永泰梁國竟廢春燕好巫  
繼鵬惑之有妖人譚紫霄以左道見幸事無大小皆  
決焉紫霄言紫薇星臨後宮敎繼鵬別造紫薇宮爲  
春燕遊幸之所土木之盛倍于東華又築三清臺三

層于城中括民間黃金數千斤鑄寶皇大帝元始天尊太上老君像日焚龍腦薰陸諸香數十斤紫霄導春燕諸後宮作樂其下晝夜不輟謂爲繼鵬延年未祚而媒褻亡忌國人醜之後紫霄事敗被戮倣亦以異志見殺春燕之寵寢衰繼鵬徙居長春宮夜坐忽忽不樂俄聞悲泣聲漸近彷彿見金鳳銜哀至前而歸郎李可殷陳匡勝自宫外領紅衣執戈矛者數百人繼鵬大驚趨而避之有頃宮中火起紫薇東華躍龍諸處頓成灰燼繼鵬疑控鶴都將連重遇縱火將加誅重遇懼夜半統軍圍長春宮繼鵬挾春燕率黃

門衛士斬關出奔次梧桐嶺追兵至執繼鵬歸隋莊  
縊殺之春燕度不免觸墻死時通文四年七月十三  
日也堊蓮花山側號康陵先是金鳳與延鈞亦堊是  
山號惠陵開運中南唐師敗李仁達于古城亂兵發  
諸陵剔取寶玉金鳳春燕容色如生鮮血流漬山爲  
之赤後人名其山爲胭脂山云

予居高蓋山中有農家握地遇土穴得銀錢數枚  
色黑如漆石硯一銅爐銅刀各一有篆文乾德五  
年造又石匣一啓視有抄書一帙爲陳后金鳳外  
傳不著姓名楮墨漫滅而字蹟猶可句讀農家弗

能省予聞亟往索歸叅諸史乘諸書始末多不異  
因與友人徐勣訂正之夫飛燕別傳出諸壞墻南  
部烟花檢之廢閣前代藏秘後人搜傳均有意焉  
况諸王縱慾召亂竟亡其國尤後世之明戒也是  
宜傳之以存野史之一萬曆甲辰夏五閩邑王宇  
識

生魂赴任

福州洪某有女而美嚴爲擇壻淳祐初里人羅尉年  
十七登第遂適焉羅授沿邊尉單騎之任旣而思想  
成疾百藥不効年餘其妻忽至羅怪且喜疾遂脫然

妻元好飲少食至是不飲酒顆粒不進任滿罷歸其妻由廳入中堂復見其妻由室出中堂荏苒而合乃知羅赴任後妻在家亦淹淹如瘳蓋其情感而神交云

江湖紀聞

### 孀婦影孕

謝氏者閩縣博士弟子林德賢之妻也二十喪夫家  
垂罄而無子櫟釜以須紡織鏗且無烟娣姒宗婦或  
遺之輒閉戶不受顧獨與族姑陳氏吳氏善陳氏者  
博士弟子林朝珂之妻吳氏其小妻也朝珂無子李  
時陳年二十八吳年十九並以貞順稱久之謝氏夜

織忽見機上人影急視之德賢也謝氏大驚號哭因而孕及期悉召里婦及二嫠聚其舍產一肉團見風化爲沫未幾病不能織會二嫠亦病竟餓而死

晉安

逸志

### 紅橋倡和

張紅橋閩縣良家女也居於紅橋之西因號曰紅橋聰敏博學雅善屬文豪宗右族爭欲聘之張悉不從父母問其故張曰欲得才如李青蓮者事之耳於是操觚之士聞之咸托五字爲媒張但第其優劣終無所答邑人王恭寄以詩曰重簾空見月昏黃絡繹啼

來也斷腸幾度繫書君不荅鴈飛應不到衡陽永泰  
王傅尤所鍾念乃稅其鄰舍以居一日張方睡起傅  
窺見之遂寄以詩曰象牙筠簟碧紗牕綽約佳人睡  
正濃半抹曉烟籠芍藥一泓秋水浸芙蓉神游蓬島  
三千界夢遶巫山十二峰誰把碁聲驚覺後起來香  
汗濕酥胸張得之怒其輕薄遂深居不出久之傅悒  
悒而歸最後傅之友福清林鴻道過其居留宿東鄰  
適見張焚香庭前因托鄰姬投之詩曰桂殿焚香酒  
半醒露華如水點銀屏含情欲訴心中事羞見牽牛  
織女星張捧詩爲之啓齒援筆而答曰梨花寂寂關



嬋娟銀漢斜臨繡戶前自愛焚香消永夜從來無事  
訴青天姬持詩賀鴻曰張家娘子自束髮以來一時  
名勝持行卷求通者無慮百數十人竟未嘗得其片  
語今者見答誠所希有鴻亦大喜過望因使姬通慇  
懃越月餘始獲命鴻遂舍于其家以外室處之定情  
之夕鴻作詩曰雲娥酷似董妖嬌每到春來恨未消  
誰道蓬山天樣遠盡欄咫尺是紅橋張詩曰芙蓉作  
帳錦重重比翼和鳴玉漏中共道瑤池春似海月明  
飛下一雙鴻自是倡和推敲情好日篤王僮聞其事  
卽盛飾訪鴻求張一見張愈自匿鴻謂張曰卿獨不

聞龐公之妻拜司馬德操乎張曰以吾之不可學柳  
下惠之可不亦可乎於是鴻不能強偁乃密賂侍者  
潛窺室內見鴻適與張狎因作酥乳雲鬟二詩以戲  
之酥乳詩曰一雙明月帖胸前紫禁蒲萄碧玉圓夫  
壻調踈綺牕下金莖幾點露珠懸雲鬟詩曰香鬟三  
尺綰芙蓉翠聳巫山兩後峰斜倚玉牀春色去鴉翎  
蟬翼半蓬鬆張愈益怒偁知其意乃挽鴻游三山越  
數日鴻絕裾迤歸夜至所居張方倚橋而望鴻作詩  
曰溶溶春水漾琉璃兩岼菰蒲長綠苗幾度踏青歸  
去晚却從燈火認紅橋其二曰素馨花發暗香飄一

采斜簪近翠翹寶馬未歸新月上綠楊影裏倚紅橋  
其三曰玉堦涼露滴芭蕉獨倚屏山望斗杓爲惜碧  
波明月色鳳頭鞋子步紅橋張屬而和曰桂輪斜落  
粉樓空漏水丁丁燭影紅露濕暗香珠翠冷赤欄橋  
上待歸鴻其二曰橋外千花照碧空美人遙隔水雲  
東一聲寶馬嘶明月驚起沙汀幾點鴻其三曰草香  
花煖醉春風郎去西湖水向東斜倚石欄頻悵望月  
明孤影笑飛鴻閒嘗携榼游白湖別墅鴻調玉漏遲  
一闋曰驚鴉翻暗葉桐花墜露曲房新曉爍炬香籠  
準備惜花起蚤翠沼凝脂冰活呵素手襯粧初了香

徑小水溶溶波煖正宜臨眺誰信造物無私偏付與  
容華稱顰宜笑更况花朝日日霽多陰少不惜千金  
費盡但惜取數峰殘照歸騎杳縱醉宜眠芳草張亦  
用其韻和之曰輕烟籠碧樹鶯啼香露繡帷春曉短  
夢初回頗恠賣花聲早懶下銀牀慢起纖纖手靚粧  
未了郎語小這綠稀紅暗與卿臨眺爲儂巧盡雙蛾  
移幾步金蓮花間談笑聯袂尋芳恰是春光年少一  
杯竹葉同斟休學取樂昌破照佳興杳日日踏青闌  
草後一年鴻有金陵之游乃作大江東一闕留別曰  
鍾情太甚人笑我到老也無休歇月露烟雲多是恨

况與玉人離別軟語叮嚀柔情婉戀鎔盡肝腸鍊岐  
亭把酒水流花謝時節應念翠袖籠香玉壺溫酒夜  
夜銀瓶月蓄喜含嗔多少態海嶽誓盟都設此去何  
之碧雲春樹合晚峰千疊圖將羈思歸來細與伊說  
張亦依韻賦別曰鳳凰山下玉漏聲恨今宵容易歇  
一曲陽關歌未畢棲鳥啞啞催人別含怨吞聲兩行  
珠淚漬透千重鍊柔腸幾寸斷盡臨岐時節還憶浴  
罷盡眉夢回携手踏碎花間月謾道胷前懷荳蔻今  
日總成虛設桃葉渡頭河水千里合凍雲疊疊寒燈  
旅邸熒熒與誰閒說又明年鴻寄模魚兒一闕絕句

七首其詞曰記得紅橋少年游冶多少雨情雲緒金鞍幾度歸來晚香靨笑迎朱戶斷腸處半醉微醒燈暗夜深語問情幾許情應似吳蠶吐繭撩亂千萬縷別離處淡月乳鴉啼曙淚痕深紅袖污海懷遐想何年了空寄錦囊佳句春欲去恨不得長纓繫日留春住相思最苦莫道不消魂裏腸鐵石涕淚也如雨其詩曰女螺江上送蘭橈長憶春纖折柳條歸夢不知江路遠夜深和月到紅橋其二曰驪歌聲斷玉人遙孤館寒燈伴寂寥我有相思千點淚夜深和雨滴紅橋其三曰殘燈暗影別魂消淚濕鮫人玉線綃記得

雲娥相送處淡烟斜月過紅橋其四曰春衫初試淡  
紅綃寶鳳搔頭玉步搖長記看燈三五夜七香車子  
度紅橋其五曰一襟離恨怨魂消閒却鳴鸞白玉簫  
燕子不來春事晚數株楊柳暗紅橋其六曰傷春雨  
淚濕鮫銷別鴈離鴻去影遙流水落花多少恨日斜  
無語立紅橋其七曰綺窓別後玉人遙濃睡纔醒酒  
未消日午捲簾風力軟落花飛絮滿紅橋先是張自  
鴻去後獨坐小樓居常鬱鬱無聊及鴻詩詞至遂感  
念成疾不數月而卒無何鴻歸遽往訪之道中作詩  
曰三千客路動行鑣遠別歸來興欲飄祇恐鳳樓人

待久玉鞭催馬上紅橋及至紅橋聞張已卒失聲號  
絕徬徨之際忽見床頭玉佩玦懸一緘拆之有環戀  
花一闕及七絕句其詞曰記得紅橋西畔路郎馬來  
時繫在垂楊樹漠漠梨雲和夢度錦屏翠幙留春住  
其詞曰牀頭絡緯泣秋風一點殘燈照藥叢夢吉夢  
凶都不定朝朝望斷北來鴻其二曰井落金瓶信不  
通雲山渺渺暗丹楓輕羅露濕鴛鴦冷閒聽長宵嘹  
淚鴻其三曰寂寂香閨枕簟空滿堦秋雨落梧桐內  
家不遣園陵去音信何緣寄塞鴻其四曰玉筍雙垂  
滿頰紅關山何處寄書筒綠窓寂寞無人到海闊天



高怨落鴻其五曰衾寒翡翠怯秋風郎在天南妾在  
東相見千回都是夢樓頭長日妬雙鴻其六曰半簾  
明月影瞳瞳照見鴛鴦錦帳中夢裏玉人方下馬恨  
他天外一聲鴻其七曰一南一北似飄蓬妾意君心  
恨不同他日歸來也無益夜臺應少繫書鴻鴻得詩  
詞悲感哀怨殆不勝情因賦挽詩曰柔腸百結淚懸  
河瘞玉埋香可柰何明月也知留佩玦曉峰長想盡  
青蛾仙魂已逐梨雲夢人世空傳薤露歌自是忘情  
惟上智此生長抱怨情多王偁亦以詩哭之曰濕雲  
如醉護輕塵黃蝶東風滿四隣新綠只疑銷晚黛落

紅猶記掩歌唇舞樓春去空殘日月榭香飄不見人  
欲覓梨雲仙夢遠坐臨芳沼獨傷神自是鴻每再過  
紅橋輒於邑累日

晉安逸志

### 玉香清妓

林景清閩縣人成化己亥冬以鄉貢北上歸過金陵  
金陵楊玉香者娼家女也年十五色藝絕群性喜讀  
書不與俗人偶獨居一室貴游慕之姓名邵三雖乏  
風韻然亦一時之秀景清與之狎飲於瑤華之館因  
題詩曰門巷深沉隔市喧湘簾影裏篆浮烟人間自  
有瑤華館何必還尋弱水船又曰珠翠行行間碧簪

羅裙淺淡映春衫空傳大令歌桃葉曾似花前倚邵  
三明日玉香偶過其館見之擊節嘆賞援筆而續曰  
一曲霓裳奏不成強來別院聽瑤笙開簾覺道春風  
暖滿壁淋漓白雪聲題甫畢適景清外至投筆而去  
景清一見魂銷堅持邵三而問三曰吾妹也彼且簡  
對不偶詩書自娛未易動也景清強之乃與同至其  
居穴壁潛窺玉香方倚床佇立若有所思頃之命侍  
兒取琵琶作數曲景清情不自禁歸館以詩寄之曰  
倚牀何事歛雙蛾一曲琵琶帶恨訶我是江州舊司  
馬青衫染得淚痕多玉香荅之曰銷盡爐香獨掩門

琵琶聲斷月黃昏愁心政恐花相笑不向花前拭淚  
痕明日景清以邵三爲介盛飾訪之途中詩曰洞房  
終日醉流霞閒却東風一樹花問得細君心內允雙  
雙携手過鄰家旣至一見交驩恨相知之晚也景清  
詩曰高髻盤雲壓翠翹春風並立海棠嬌銀箏象板  
花前醉疑是東吳大小喬玉香詩曰前身儂是許飛  
瓊女伴相携下玉京解佩江干贈交甫盡屏涼夜共  
吹笙夜旣闌邵三避酒先歸景清留宿軒中則玉香  
真處女也景清詩曰十五盈盈窈窕娘背人燈下卸  
紅妝春風吹入芙蓉帳一朵花枝壓衆芳玉香詩曰

行雨行雲侍楚王從前錯恠野鴛鴦守宮落盡鮮紅  
色明日低頭出洞房居數月景清將歸玉香流涕曰  
妾雖娼家志常不染顧以陋質幸侍清光今君當歸  
勢不得從但誓潔身以待令此軒無他人之迹君異  
日幸一過妾也景清感其意與之引臂盟約期不相  
負遂以一清名其軒乃調鷓鴣天一闕留別曰八字  
嬌蛾恨不開陽臺今作望夫臺情方好處人相別潮  
未平時僕已催聽囑付莫疑猜蓬壺有路去還來  
璚一樹垂絲柳休傍他人門戶栽玉香亦以鷓鴣天  
答之曰郎是閩南第一流胸蟠星斗氣橫秋新詞宛

轉歌才畢又逐征鴻下翠樓開錦纜上蘭舟見郎驩  
喜別郎憂妾心政似長江水晝夜隨郎到福州景清  
遂訣別歸閩音信不通者六年至乙巳冬景清復携  
書北上舟泊白沙忽於月中見一女子甚美獨行沙  
上迫視之乃玉香也且驚且喜問所從來玉香曰自  
君別後風枝南北天各一方魚水懸情相思日切是  
以買舟南下期續舊好不意於此邂逅耳景清喜出  
望外遂與聯臂登舟細叙疇昔景清詩曰江上尋春  
恰遇春一回見面一回新含悲細說分携後夜夜相  
思入夢頻玉香詩曰鴈杳魚沉各一天爲君終日淚

潛然孤蓬今夜烟波外重訴琵琶了宿緣嗟畢垂泣  
悲啼不能自止天將曙遂不復見景清疑懼累日及  
至金陵首訪一清軒門館寂然惟邵三縞素出迎泣  
謂景清曰自君去後妹閉門謝客持齋誦經或有強  
之萬死自誓竟以思君之故遂成沉疾一月之前死  
矣景清聞之大駭入臨其喪拊棺號慟是夜獨宿軒  
中吟詩曰往事淒涼似夢中香奩人去玉臺空傷心  
最是秦淮月還對蘭閨燭影紅因徘徊不寐惘惘間  
見玉香從帳中出唏噓良久亦吟曰天上人間路不  
通花鈿無主畫樓空從前爲雨爲雲處總是襄王曉

夢中景清不覺失聲呼之遂隱隱而沒

晉安逸志

### 秋英冥孕

韓夢雲福清諸生也嘉靖甲子授經於邑之藍田道過石湖山見遺骸焉哀而掩之其夜宿於藍田書舍忽聞異香滿室頃之一童子歛扉投刺曰娘子奉謁夢雲愕然則麗人已立燈下歛衽而拜曰妾蒿里之累也委身草莽二百年於茲矣君子厚德惠及骸齒靜言感念啣結焉忘偶作小圖用伸寸報遂出袖中彩幃一軸以遺之題其標曰萬鳥啼春夢雲罄折拜受因詢其家世麗人曰妾楚人也姓王氏名秋英澹



容其別號也父曰德育元至正間以兵曹郎參軍入  
閩妾從父之任見執強寇至石湖山不忍受污投崖  
而死曩者車騎臨況躡踵相從此亦夙世因緣非偶  
爾也因與夢雲共談言如懸河夢雲曰卿能詩乎曰  
惟先生命於是啓齒微吟曰咄咄復咄咄二百年來  
滯閩越回頭往事付空華淚逐西風寒刺骨當時恨  
不蚤見幾扁舟一葉隴襄歸海上烽烟驀地起一家  
骨肉隨流水渺渺殘魂寄碧岑花開花落古猶今相  
逢此日無他物贈爾平生一片心夢雲擊賞久之遂  
申伉儷之私枕上作滿江紅一闕曰偶度銀河霎時

間雲收雨歇枉做了叢莽溪頭一場轟烈江上風雨  
百年心家國存亡千里月媿今宵勾引蔓藤又添淒  
切烟花耻應難雪雲雨債何時滅只爲塵緣把白瑜  
玷缺高唐夢裡情如海望帝山中淚成血羞睹着嫦  
姁長自在瑤瑤闕比曉起謂夢雲妾以感遇之故失  
身於君惟君始之惟君終之君之惠也不者曲且在  
君妾何敢言遂飄然而去自是數日一至至則讐校  
經籍楊權古今意灑如也是歲之冬夢雲歸自藍田  
獨坐於其家之小樓秋英遣向者童遺之以詩曰朔  
風震撼似瀟湘滿樹歸鴉噪夕陽不見王孫停駟馬

惟聞牧豎喚牛羊荒山野水悲長夜懶鬢疎容怯凍  
霜漠漠陰雲愁黯黯幾時相對一爐香夢雲乃以除  
夕設主於樓薦以酒肴其夜秋英盛裝飾而至與夢  
雲讌飲酒酣凭夢雲肩作臨江仙一闋曰燈火滿城  
鳴竹爆家家收拾殘年春陽初轉動朱絃金爐香幾  
縷裊裊散輕烟人事天時又一歲迎春送臘開筵多  
情盃酒更烹鮮殷勤斟玉斝相對淚潸然明年寒食  
夢雲復携鷄黍過秋英墳上少頃秋英至設席籍草  
謳唱相和夢雲以巨觥酌秋英曰今日之樂千古一  
時可無片詞以紀盛事於是秋英乃作瀟湘逢故人

慢一闕曰春光將暮見嫩柳拖烟嬌花帶霧頃刻間  
風雨把堂上深恩閨中遺事鎖火留飭都付却落花  
飛絮又何心挈壺提壺闢草踏青載路子規啼蝴蝶  
舞遍南北山頭紙灰綠醅奠一丘黃土嗟海角飄零  
湘陰淒楚無主泉扃也能得有情鷄黍盡角聲吹落  
梅花又帶離愁歸去因謂夢雲曰妾懷君之子今將  
免身矣當產君家食以生人乳少許乃可育於人間  
也遂與夢雲並轡同歸夢雲妻子皆安之客有問及  
澹容前身者以詩荅之曰地老天荒一化人寒烟荒  
草度芳晨冥冥渺渺無生死豈有前身與後身其二

日乳乳瘦魄濯寒流偶爲塵緣世外游莫道此生原  
不減生生滅滅一浮漚後月餘產一丈夫子時乙丑  
年四月十八日也夢雲妻聞之大喜遍覓人乳以食  
之於是里人求觀者如堵矣秋英乃謂夢雲曰神奇  
之事愚者駭焉兒育於君恐招物議妾當歸楚寄兒  
於楚人後十八年圖與相見未晚也乃作留別詩曰  
兩年驩會夢魂中聚散人間似轉蓬歲月無情催去  
燕關河有信寄來鴻劍沉延浦光終合瑟鼓湘靈調  
自工他日扁舟尋舊約夕陽疎影楚雲東遂將兒孳  
瓦升屋而去忽一日遺夢雲以詩曰處處青山叫子

規家家乳燕鑄芹泥獨憐知己千山外遙望白雲雙  
眼迷是後每歲巧夕一過小樓嘗作滿江紅一闕曰  
蓐暑誰收秋聲報梧桐一葉又聽得蛩泣堦除鴈啼  
沙磧清光玉宇本無塵無柰妬雲遮素魄意難忘倏  
忽馭飈輪尋舊約柳風踈歡情折蓉露冷離愁結這  
滴滴丁丁不堪苦惡夢魂河漢隔年期骨肉關山千  
里別兩關情極目楚山雲龍江月迨至萬曆壬午遺  
書夢雲招之入楚曰兒寄湘陰黃朱橋今弱冠矣君  
得無意乎妾請爲鄉道暇間賦得長相思二篇請教  
其詞曰長相思相思長獨鶴高飛九廻翔楚天嘹唳

驚胡霜側身東望淚沾裳思君間阻天一方欲往從  
之河無梁臨流欲遡川無航江東渭北恨參商安得  
共此明月光長相思相思長其二曰長相思相思長  
寒蟲唧唧九迴腸中夜爲君起徬徨期君不至倚胡  
床衰草淡烟漫隴襄願言載道歷盤塘扁舟一葉過  
武昌身隨鴻鴈度衡陽無令戚戚滯湖湘長相思相  
思長是年夢雲不果行明年乃行自洪塘買舟秋英  
已先至矣與之同寢處他人莫見也及至湘陰果有  
黃朱橋者湘陰豪宗也有三子曰鶴笑鶴齡鶴鳴鶴  
笑得之神女叩門授兒忽不見以白布裹兒也而題

以血書曰血書尺帛裹呱兒抱送君家好護持乙丑  
之年辛巳月甲申日主丑初時閩生楚長人非幻陽  
氣陰胎事亦奇莫道螟蛉難似我恩深還有報恩期  
末書十八年後閩有韓夢雲來此其子也及夢雲至  
相視愕然夢雲具道其詳朱橋大駭鶴笑持父哭幾  
不自勝是時鶴笑已婚易氏女不能從父之閩夢雲  
遂留飲數十日而別秋英乃從夢雲入閩閩士大夫  
及當道諸公往來玉融卜事求詩者踵相接也萬曆  
癸巳年秋英謂夢雲曰妾以冥數得侍巾櫛不自韜  
斂籍籍人間今者賓客如雲荅之則事涉漏泄不荅



咎且歸君然亦塵緣已盡吾將從此逝矣夢雲及妻  
子聞之驚愕挽留秋英竟揮淚而別於是舉家皆號  
慟爲之舉喪今遂寂然

萬鳥啼春集

### 合歡紅帶

陳筑字夢和莆田人崇寧初登第爲古田尉惑邑倡  
周氏周能詩贈筑絕句曰夢和殘月過樓西月過樓  
西夢已迷喚起一聲腸斷處落花枝上鷓鴣啼首句  
蓋寓筑字也又春晴詩曰瞥然飛過誰家燕驀地香  
來甚處花深院日長無箇事一瓶春水自煎茶后與  
筑作合歡紅綬帶自縊於南山極樂院有知之者共

排闥救免已而事敗筑失官去周至紹興初猶在旣  
老且醜門戶遂零落云

夷堅志

### 西軒密約

林澄字太清候官人年十七與同里戴貴共學館於  
戴之西軒一日澄借名文二卷約貴各錄其一澄閱  
旬繕寫不及而貴則五日成帙字畫端整澄心異之  
謂貴曰何卿書之太速耶貴曰某有妹氏名伯璘年  
方及笄粗通詩詞頗美筆墨妹氏爲我分抄故爾時  
生尚未約婚而女亦未許人生意有所屬不敢自白  
于父母一日適貴他往女在繡簾之後窺生容貌雋

偉相視目成久之生歸西軒情不自禁乃題一詩於  
團扇之上云目似秋波髻似雲繡簾深處見紅裙東  
風嫋嫋吹香氣夢裏猶聞百和薰女有丫鬟壽娘者  
亦知字義女命壽娘送茶與生見生扇頭有詩遂持  
報女女見生詩喜動顏色乃密賦古風一章仍命壽  
娘寄生云妾本葑菲姿青春誰爲主欲結箕箒緣嚴  
親猶未許憐君正年少胸中富經史相逢荷目成愁  
緒千萬縷咫尺隔重簾脉脉不得語願君盟勿渝蚤  
諧鸞鳳侶莫學楚襄王夢中合雲雨自後書札往還  
無間晨夕上元之夜女至西軒赴生期約鷄鳴而別

且訂生諧伉儷死塋同穴生賦詩云四鄰歌吹玉缸  
紅始信藍橋有路通無賴汝南鷄唱曉驚回魂夢各  
西東女詩云風透紗窓月影寒鬢雲撩亂晚妝殘胸  
前羅帶無顏色盡是相思淚染班時戴氏父母欲爲  
女議婚他姓女鬱鬱不樂乃作詩寄生云憶昔當時  
錯認君妾身輕賤染紅塵雲情雨意渾如夢海誓山  
盟總未真柳毅不傳空口信王魁元是負心人好花  
自有欄杆主浪蝶狂蜂枉費神蹤跡由是益密家人  
莫之覺也中秋之夕生復會女于繡房忽忽不樂女  
亦無所驚訝枕席之驩極其纏綿漏下四刻貴有家

奴安郎者探知生在繡房持斧突入殺生仆地皇急  
報生父母女見生氣絕乃取羅帕自經雙手抱生屍  
而死兩家父母聞之無不嗟悼檢其篋中得詩數十  
首皆情至之語一時傳誦女兄素與生厚議以生女  
合塋于東郊清貴坊題曰雙鴛塚時有文人吳子明  
爲之銘曰壁碎珠沉蘭摧玉折生願同衾死謀同穴  
塚號鴛鴦魂爲蝴蝶華山畿英臺墓連理枝合歡樹  
古有之今再遇時正德三年

戴林記

### 沙陽哭妓

林子羽少遊沙陽狎一妓朱氏情好甚篤及子羽應

辟司訓將樂取道沙陽而朱氏死矣乃作絕句九首  
哭之青樓十二敞銀屏長記生前幾醉醒今日重來  
人不見七峰猶似黛眉青珠沉玉殞兩茫茫十里溪  
流與恨長依舊春山花似綺不知何處瘞蘭香二十  
年來一夢歸楚臺秦館事應非春魂想化西園蝶猶  
向碧桃花下飛綠楊兩葉想眉顰誰寫新詩詠性真  
一自朱樓人去後鶯花不似舊時春玉露幽蘭憶淚  
泫殞宮幽暗夜如年空餘舊日香奩句一度悲吟一  
惘然青鸞影斷夢難回暝揜紅顏向夜臺可惜玉樓  
空鵲鏡也隨羅綺塋寒灰舞袖何年化作雲玉簫聲

斷鳳離群春風似惜泉宮恨片片吹花落古墳蘭消  
桂蠹雨初晴寂寂泉宮夜不明聞說七峰山下水至  
今流恨也吞聲柳臺花榭寄塵踪名籍蓬萊第一宮  
晚出人間風露表佩聲夜夜響空

竹窓雜錄

### 七夕戲文

福州孫昌裔字子長爲進士承以子寓京中莊太史  
家與其子喬申同授經于曹孝廉癸未七夕感牛女  
之事生固通古文詞因爲文達于牛女本游戲翰墨  
耳旣而生忽暴卒第心頭微熱莫知其故越三日忽  
甦時其父師皆聚哭屍旁生注目視曰我在此耶頃

爲神妃召去所居金屋瓊樓綃帷貝榻侍衛皆妖麗  
姣好群譟偶舞日夕留欸不絕欲成伉儷裔思父不  
從辭歸旁爲勸解而意彌堅妃始爲祖餞供帳絡繹  
相接于道歌姬侑觴皆有戀別之思醇醪遞進不知  
別成景象在父師旁也裔與申皆駿才後歸就試並  
居首

耳談

### 荔枝假夢

明皇旣幸蜀貴妃縊死於馬嵬十八娘亦歸里中居  
晉安城東報國院至德三載無疾而卒遂就院傍之  
隙地瘞焉萬曆中有東海生者閩人也一日出遊東



郊少憇於報國院晝長假寐夢至一所朱戶紅樓丹  
盈紫閣極其壯麗徘徊間俄見一雙髻侍兒紅裙翠  
袖揖生而進曰奉十八娘命敬邀郎君生從之入未  
及百步香氣襲人行至一室扁曰扶離別館少頃見  
綠紗侍兒導一女郎年可十七八衣絳綃衣顏色殊  
絕冉冉而至生進曰偶因休暇駕言出遊旣昧平生  
敢逢勝果女郎曰妾開元皇帝侍兒也以江采蘋之  
薦得幸于上今歸此中以與郎君有夙緣故相屈耳  
因出金鍾貯瓊液以酌生生飲之甘如醍醐醴酪酒  
酣姬容色轉麗因歌菩薩蠻一闕妾身本是瑯琊種

當年曾被君王寵艷態聞紅粧人稱十八娘絳綃籠  
玉質纖手金盤擘驛路起塵埃驪山一騎來生聞之  
愈加歎賞因請問開元遺事姬曰妾憶在宮中時正  
月十五夜上御常春殿遣妾撒闔中錦九於地令宮  
人競拾之多者受上賞又一日上幸長生殿奏新曲  
未有名值妾爲貴妃稱觴上大悅遂以妾名其樂左  
右歡呼聲動山谷此皆妾之受寵於上不聞於人間  
者生聞之愈驚駭旣而侍兒報以江家周家陳家三  
姬至江衣綠周衣紅陳衣紫種種妖麗三姬曰聞吾  
姊今日有佳賓故來相賀三姬各集古詩二章江姬

吟曰百般紅紫闌芳菲隔水殘霞見盡衣別有玉杯  
承露冷紅妝飛騎向前歸野人相贈滿筠籠時似開  
元天寶中火樹風來翻絳艷樹頭樹尾覓殘紅周姬  
吟曰紅樹枝頭日月長一枝濃艷露凝香凌晨併作  
新妝面玉碗盛來琥珀光綠蘿陰下到山庄丹粉經  
年染石牀飽食不須愁內熱已分甜雪飲瓊漿陳姬  
吟曰何處橫釵帶小枝可憐妖冶正當時曾緣玉貌  
君王寵莫比潘家大谷梨可愛深紅愛淺紅離離朱  
實綠叢中不知多少開元事香氣潛來紫陌風三姬  
驗畢十八娘亦集古句二首遙指紅樓是妾家瓊枝

日出晒紅紗摘時正帶凌晨露應服朝來一片霞曉  
漱瓊膏冰齒寒一生長對水晶盤香隨翠籠擎初到  
長得君王帶笑看四姬唵畢十八娘出紅繡鞋一雙  
贈生且囑曰願君以此傳之人間旣而江姬出麝囊  
一函周姬出真珠一顆陳姬出紫瓊一枚爲贈生遽  
然驚覺惟見荔枝香熟繁星離離詢其旁果有十八  
娘塚云因賦詩曰驪山一騎紅塵起七日能行數千  
里丹荔飛來色正新金盤滿注華清水花外遙聞百  
步香寒冰一片剖羅囊長生殿上連枝進太液池頭  
半醉嘗樂工初製梨園曲小部音聲聽不足佳名新

賜荔枝香左右歡呼動山谷一聲鼙鼓震漁陽西幸  
鑾輿道路長蛾眉宛轉含情死馬上君王掩面傷炎  
方仍進青絲籠垂涕還思當日寵丹實猶然貢上方  
朱顏久已歸荒塚妃子妖魂去渺茫千秋何處識紅妝  
夢中細說前朝事不及王家十八娘慢亭集

### 採花方便

採花王剛中爲福建御史有尤溪張生者與隣女私  
通被獲到官剛中見簷前蛛網懸蝶指曰女能爲詩  
可賦此張吟云只因賦性大顛狂遊遍名園竊盡香  
今日誤投羅網裏此身惟仗採花郎剛中悅又指竹

簾謂女曰汝可賦此女亦吟曰綠筠擘破條條直紅  
線經開眼眼奇爲愛如花成片段致令直節有參差  
剛中見二人未議婚問愿合否生首懇之卽判云佳  
人才子兩相宜致福端由禍所基未作夫妻諧汝愿  
不勞鑽穴隙相窺時稱爲王方便云

群談采餘

### 花樓吟咏

大曼生者東海人世有聞人生居閩中幼從父宦遊  
四方熟玩經史且工詞賦年十九自吉州還閩僦寓  
城東大厦惡其喧雜妨誦習功廼賃別業于委巷中  
屋僅數椽而主人之園圃近焉草樹扶疎花柳間植

有濠濮間想生常散步園中吟咏自適一日偶值雙  
鬟導一女郎年可十七後園采花不知生之先在也  
生逡巡避之女見生風神俊爽氣度閒逸且聞主善  
詞翰情亦不能自禁遂却步歸異香縹緲真若仙姬  
之臨洛浦也生自是神爽飛越讀書之念頓廢越旬  
餘復于園中值向者雙鬟因詢之曰君家女郎識字  
乎鬟曰女郎日夕手一編不輟豈不識字某常見女  
郎喜抄唐人詩不但工刺繡而已生曰吾有一詩汝  
能爲吾致之乎鬟曰郎君善詩女稔知之某敢不爲  
郎君作致書郵平生遂賦一絕云春園花事闌芳菲

萬綠叢中見茜衣自愧含毫非子建風流難賦洛中  
妃女得詩見其詞翰雙美再三吟味遂次韻以荅之  
云小園芳草綠菲菲粉蝶聯翩展畫衣自愧一雙蓮  
步闊隔花人莫笑潘妃自此槐黃期逼生就省試家  
人促歸不敢通問秋後放榜生不第鬱鬱復携書于  
別業女恒遣雙鬟慰勞之生由此得定情焉遂贈生  
玉玦半規紫羅香囊一付生賦詩云數聲殘漏滿簾  
霜青鳥啣箋事渺茫剖贈半規蒼玉玦分將百合紫  
羅囊空傳垂手尊前舞新結愁眉鏡裏妝一枕遊仙  
終是夢桃花春色誤劉郎時生已約婚而女亦受采



女常居花樓之下所著有花樓吟一卷秘而不傳惟  
生得一再覩焉其寄生詩甚多有云重門深鎖斷人  
行花影參差月影清獨坐小樓長倚恨隔牆空聽讀  
書聲踰年生就婚女亦適人蹤跡遂絕焉然詩札往  
來歲猶一二至越數載生得舉賓薦戒行有日女寄  
書以通殷勤生賦柳稍青一闕別之鶯語聲吞蛾眉  
黛蹙總是消魂銀燭光沈蘭閨夜永月滿離尊羅衣  
空濕啼痕腸斷處秋風暮猿潞水寒冰燕山殘雪誰  
與溫存生故多情而俳詞艷語半爲女發也又隔數  
歲女因念生得瘵疾臥床日久思一見生生乃託爲

醫者視脉而進女見生咽不能語如求訣狀遂出是  
夕女一慟而絕家人莫之知也生哭之詩云玉殞珠  
沈思悄然明中流淚暗相憐常圖蛺蝶花樓下記刺  
鴛鴦繡幙前稔有夢魂能結雨更無心膽似非烟朱  
顏皓齒歸黃土脉脉空尋再世緣不數月而生亦卒  
晉安逸志

### 玉主報讐

林丙卿福清人生平倜儻好遊俠邪燕姬劉鳳臺者  
年十五有聲教坊貴游爭慕之一見丙卿驩甚托以  
終身丙卿破數百金納爲妾久之丙卿遊吳越間道

聞姬死慟哭幾絕疾馳抵燕日夜哀痛刻玉爲主提  
携不去左右爲賦長短句題玉上曰入時倒郎懷出  
時對郎面隨郎南北復西東芳草天涯堪遶徧勝寫  
丹青圖勝妝水月殿玉魄與香魂都在此一片願作  
巫山枕畔雲願作盧家梁上燕莫似生前輕別離教  
人看作班妃扇後丙卿去燕復遊西粵僦舟東下爲  
舟人陳亞三所殺沉其屍于江掠其貲以去蒼梧林  
司理丙卿友也夜半忽見婦人稱寃狀因呼邏卒嚴  
捕禦人者卒搜亞三橐得玉主司理大驚穷索餘黨  
伏辜求得屍顏面如生肌肉不損觀者異之徐惟起

爲作玉主行云燕山幻出娥眉質翠羽鳴璫金屈膝  
就中百萬倚門倡若箇輕盈稱第一傾城少女長劉  
家十五妖嬈未破瓜到處名姬羞粉黛一時佳冶避  
鉛華櫻唇半啓飄金縷百轉嬌喉鶯乍乳間拂朱絃  
奏鳳凰時拋紅豆調鸚鵡對客閒叅湖上禪桃花重  
製蜀中牋芙蓉學繡相思枕榆莢羞看買笑錢五陵  
俠客紛無數爭進千金求一顧妾貌雖同解語花妾  
心已作沾泥絮風流閩海說林郎年少曾登遊冶場  
黃金盡買纏頭錦贏得聲名遍教坊明珠欲換娉婷  
女金谷園中貯歌舞滿眼無人荷目成劉姬一見心

相許結束歡然出俠邪九枝銀燭七香車鴛鴦忽比  
雙飛翼茁菑俄開並蒂花珊瑚寶玦流蘇帳蜀錦紫  
絲繁步障占斷春風歲復年秦箏趙瑟搗還響可憐  
行樂在須臾夫婿長遊入五湖膏沐嬾施雲鬢亂空  
床獨守夜燈孤春花秋月無情去誤妾佳期等閒度  
婉意柔情孰與伸千愁萬恨憑誰訴明河耿耿路迢  
迢絕望音書嘆寂寥紅頰每于愁處損朱顏多向暗  
中凋思君不見令人老柳葉雙眉畫慵掃香魂渺渺  
落黃泉玉骨纍纍瘞芳草人傳消息五湖西夫婿傷  
情掩面啼碧沼游魚乖比目雕梁飛燕失雙栖哀絃

聲斷絲難續死別生離成一哭沈思無計表深情售  
得連城舊明玉磨礪朗潤復輝光賦得悲哀句短長  
中間自鏤芳卿字未下金刀先斷腸錦囊裝貯殷勤  
記鎮日重重牢繫臂東西南北但隨身旦夕何曾暫  
相離携向蒼梧萬里遊逢人開取淚先流鷓鴣叫月  
悲長夜蛤蚧鳴風感素秋江頭忽遇探丸客化作杜  
鵑歸不得黃昏野魅泣精靈暮雨遊鱗啼怨魄玉主  
漂零何處歸芳魂長繞粵江飛夜臺飲恨重相見朽  
骨含冤事已非蒼梧司理眠官閣忽覩仙姬來綽約  
含怨含顰若有詞半羞半怯如相託索索陰風毛骨

寒分明環珮韻珊珊漸聽嗚咽聲初遠起視明河漏  
欲殘心知非幻仍非夢定有幽魂抱深痛綵線縫裾  
獲赭衣驟看玉主神驚動由來此物屬林郎刻玉題  
詩爲悼亡珍藏久識依懷袖流落何因在異鄉傷心  
細向公庭鞠舊鬼哀呼新鬼哭始覺孤身入虎牙更  
悲俠骨填魚腹詎信蛟龍不忍吞隨波逐浪幾朝昏  
千秋重閱曹盱事九辨難招屈子魂吁嗟此事何奇  
絕名姓從茲播西粵真迴白日照重泉果有嚴霜飛  
六月片玉堪將恩遇酬死生肝膽在紅樓方知白璧  
能伸恨不獨青萍解報讐又鄧原嶽作云林君少小

負奇氣二十結客學文字長安遍謁諸賢豪小語纔  
纔各有致有時走馬入平康平康美人號鳳娘相逢  
相睚無此客願持箕帚侍君房俠烈相期豈瑣瑣芳  
心一寸炯如火便將白璧售娉婷何惜明珠買婀娜  
美人嬌媚壻風流紫陌香奩不解愁春風暖抱鴛鴦  
帳明月光窺翡翠樓世間萬事有翻覆玉缺珠沉一  
何速自埋匣鏡不迴光旣斷琴絃卽再續旅泊淒涼  
閒舞衣羅幃風動是邪非始信佳人難再得幾番夢  
裏空歔歔賦罷招魂魄不返腸斷鉛華日應遠聊將  
良璞刻芳名比作茗華勒琰琬餘哀寫出斷腸詞併



入瓊瑤寄所思。決絕難消千載恨。連綿更訂九泉期。  
生死提携不相離。五色絲絛勤繫臂。身隨南北復東  
西。臥卽同床行並轡。無端忽作蒼梧行。瘴江瘴草愁  
孤征。何物舟師太無賴。綠林暴客誰知名。砍頭陷胃  
意何酷。擲向深潭飽魚腹。并將玉主爲珍藏。新鬼含  
冤舊鬼哭。蒼梧理官方少年。與君鄉曲習君賢。夜夢  
美人拜且哭。醒來惓縮心忙然。便令處處尋踪跡。玉  
主光芒射四壁。破壁如聞叱咤聲。捧出人人皆動色。  
使君一見心。生悲吁嗟此物從何來。疇昔之夢真有  
以。滿堂撼撼陰風吹。賊也聞言咋舌死。快意當前寧

有此盡縛餘黨察根因腐肉由來付湘水湘水浮來  
七尺軀依然面孔血模糊使君撫尸三嘆息群盜一  
一伏其辜憶昔從君接杯酒醉後嘲噀無不有知君  
俠氣永不磨知君俠骨終難朽異哉玉主能報仇不  
妨聲價重青樓區區千金豈足較平生恩怨爲君酬

竹窓雜錄

### 破鏡分離

莆田陳子卿少年隨父宦京邸有鄰女見子卿美丰  
姿而悅焉旣而歸閩女剖妝鏡半規爲贈且與子卿  
爲約如樂昌故事未幾子卿舉孝廉再入都門則女

已移家他徙踪跡未絕不復合焉嘗持破鏡嗚咽不  
已陳幼孺聞其事爲作破鏡行云樂昌寶鏡青銅面  
閃鑠光圓才一片憶從生少遇君時君情搖蕩妾慙  
痴時時並臂迫肩立持照青閨雙黛眉銀箏風斷瓶  
入井金縷雙鸞不交頸空持一半表相思南北分形  
更分影妾身不及青趺血但使菱花空瓦裂何因繡  
閣匣中銅得似延津波下鐵

烏山幽會

林生子真讀書烏石山房往返里巷間有一姝素服  
淡妝倚門露半面曰徐徐行者誰氏郎君耶林愕然

大驚且口噤猝無可語行道之人復沓至目招而過之陽碩侍兒言他事侍兒心微指志其居歸令覆往通殷勤因訪隣嫗知爲張壁娘壁娘者良家女也于歸半歲夫亡壁娘光麗艷逸妖美絕倫里中少年聞其新寡競委幣焉張皆不受獨竊從戶窺林心悅而好之恐不得當也張所居後卽山山上折而數十武卽林讀書處張卽期以旦日踏青來會當是時載酒遊者趾相錯也張出適與諸游者會諸游者薄而觀之林亦混焉各自引嫌不交一語而歸林鬱鬱不自得乃賦詩云秋波頻轉瞥檀郎脉脉低回暗斷腸只

爲傍人羞不語綺衣縹緲但聞香張所居妝樓之上  
又有複閣枕上麓甚祕先是林遣侍兒至張所張陰  
教置之是夕張使侍婢引林匿複閣中夜靜張篝燈  
至遂爲長夜之樂平明沐從山麓而出如是者累月  
而張亦時詣林讀書山房無何林移家臨汀就父公  
署臨別之夕不復自言其情但與張極歡痛飲而已  
明日登車徑去久之張始知林去遠忽忽若有亡又  
以林去時不爲一言輕薄背負乃至於此感想懊恨  
遂成沉疴陳幼孺聞其事遂爲詩代張以寄林云黃  
消鶯子翠消鴉簾拂層波帳九華裙帛褪來腰束素

釧金鬆盡臂纏紗牀前弱態眠新柳枕上迴鬟壓落  
花不信登牆人似玉斷腸空盼宋東家林得詩始知  
張病因臨汀王相如入會城附書於張且與爲約而  
張於數日前死矣王生歸言狀林失聲投地幾不自  
勝作悼亡詞四首有客何來自越城聞君去伴董雙  
成相期總在瑤池會不向人間哭一聲去歲飲君金  
屈卮桃花人面兩相宜于今花在人何處腸斷魂消  
是此時潘嶽何須賦悼亡人間無驗返魂香更憐三  
載窮途淚猶洒秋風一萬行共知月缺有時圓雨落  
無由得上天昔是生離今死別乾坤此會定何年明

年林自臨汀歸閩逡巡過張所居塵網妝樓燕鳴故  
壘而張埋玉西郊矣林自是不復讀書舊館因賦感  
舊詩二首落梅到地夜無聲幰挂空堦碎月明徙倚  
朱闌人不見雙懸清淚聽寒更梅花歷亂柰愁何夢  
裏朱樓掩淚過記得去年今夜月美人吹入笛聲多  
張氏好音尤善吹簫往者詣山房常倚梅花吹簫云

竹窓雜錄

榕陰新檢卷十五終